

## À la mi-Avri les héthondes et l'orfi et l'coucou s' i' vit

La plîupart des langues dé l'Ûrope ont des ditons sus l'arrivée du R'nouvé dêcrithant les ouâisieaux et les flieurs tchi appathaïssent à chu temps. J' sommes p't-êt eunique à aver un diton dans létché un pâisson est comme l'hérait.

L'orfi, garfish or snipe en Angliais, soulait êt' dans l'temps passé hardi populaithe sus l' marchi à pâisson, mais achteu oulle est mains consommée ichîn, l'goût moderne pense qu' i' y' a trop d' héthèques et lus bliu- vèrt couleu n'est pon appétissante, en fait, les orfis sembl'yent gouêmis.

Dans la Manche, les orfis soulaient v'nîn dans la mé mains profonde près d' nouot' côte raiqu' auprès l' Avri à seule fîn d' pondre et i 'taient souvent attrapés par les pêtcheurs en *maqu'selant*. Mais au jour d'aniet i' sont également attrapés en hivé.

Les noms, l' héthonde dé cheunm'née et l' héthonde dé tchèrquéthie

qué j'donnons à l'héthonde témoignent dé lus volanté de chârer nos granges, nos garages, nos établyes et même nos maisons duthant san séjour dans l'hémisphère du Nord.

Comme nous les héthondes soulaient être les troglodytes, mais dépis qué jé c'menchîmes à construite nos preunmyis abris et ches ouaîsieaux trouvaient qu' les crévons sous l' lief taient également idéal pour lus nids.

Lus prôn'nie charmante rav'nant l'ieau couthante, est un son constant, sustout quand il' assembl'yent sur les fis télégraphiques. Où assemblaient-ils d'avant la ramont'tie des fis?

J' les faîthons la beinv'nue alentou de nos maîsons car l' chassent assez près d' la tèrre et prannent un tas d'ïnsectes pestféthés, les mouques, les taons et les peurchons. Lus vol élégant et agile, teurtant et touônnant à fond d'train, sans aver eune collision et appathement sans effort, est un pliaîsi à r'garder.

Et pis not' traîsième héraut, l' coucou tchi înspithe tant d' chansons, d' poèmes et d' ditons dans tout l'Ûrope. S'n arrivée en avri est hardi anticipé et aver la preunmié lettre, annonchant ouiyant du coucou, împrîmée dans la gâzette, ou dans The Times, est eune source d'ordgi. Il faut tout comme être prudent au jour d'aniet pa'ce qué j' avons la Teurtérelle Turque, en Jerri d'pis mille neu chents souaixante-deux , car les appels peuvent sonner hardi pathé. Ch't ouaîsé est si symbolique du R'nouvé que j'avons donné san nom à un tas d'autres flieurs et d'ouaîsieaux du temps d'saîson. Par exempl'ye coucou seul pour des pip'soles, des clioches d' Carême et des violettes, du bianc coucou est d's iliets rotchi, du rouoge cuckoo est d's iliets d'fosse.

Un d' nos noms pour l'alouette dé mielle ou pievis est 'mèthe d' coucou' viyant qu' ou est l'hôte favori du coucou.

Lé p'tit coucou piqu'sa hors du nid les propres oeufs des pievis, pis les adultes chinn'nont à seule fin d' souogni lus ênorme nouôrrichon.

Les pouochins d' coucou ont la capacité r'mèrquabl'ye de sonner comme deux'-trais pouochins d'pievis tchi cause les adultes à les nouôrri constamment. Heutheusement, l'alouette dé mielle a pus d'eune nichie par an et, avec un mio de chance, lé préchain nid ne s' sa pon *parasité* par un coucou.

Malheureusement, ch' n'est pon prouvabl'ye que les coucous sont à élever avec succès ichîn d'pis deux mille neuf.

J' les viyons et les ouïyons dans lus pliaiches traditionnelles et l' n'y a pas eune disette d' lus hôtes préférés. Mais pas d' jannes coucous.

*Et dans l' av'nîn? Not' diton dans chent ans, étha-t-i' acouo du sens?. L'orfi arrive d'avant Avri, l' nombre d'héthondes et d' coucous dans le monde est à subithe un grand dêchet. Don, Avri s' sa p't-être hardi difféthent.*

,

.